

H A U S T 2 0 1 4

MA-fréttir

Ritstjóri Sigurlaug Anna Gunnarsdóttir

Myndir og uppsetning Sverrir Páll

MENNTASKÓLINN Á AKUREYRI
MA
SCHOLA AKUREYRENSIS



Ágætu foreldrar / forráðamenn nemenda

Nú er haustönnin ríflega hálfnuð og þunginn í náminu því vissulega farinn að aukast. Margskonar óhefðbundið nám hefur líka átt sér stað liðnar vikur, ekki síst hjá fyrsta bekk.

Allir bekkirnir á fyrsta ári fóru í skálaferðir á fyrstu vikum skólaársins í umsjón foreldrafélagsins. Þær ferðir gengu afar vel og eru mikilvægur þáttur í því að skapa góðan bekkjaranda. Ýmsar ferðir eru hluti af áföngunum menningarlæsi og náttúrulæsi í 1. bekk, námsferðir til Siglufjarðar og Mývatnssveitar, auk þess sem farið hefur verið í leikhús og í vinnuferð í Kjarnaskóg. Svo fór fyrsti bekkur á sýningu Þörupilta í Hofi. Annar bekkur fór í námsferð í sögu, á Sturlungaslóðir í Eyjafirði og Skagafirði.

Kynningar fyrir foreldra

Skólaárið hófst með fjölmennri skólaþingunni og að henni lokinni var kynningarfundur fyrir foreldra nýnema. Kennarar í menningarlæsi og náttúrulæsi stóðu einnig fyrir vel sóttri kynningu á áföngunum 21. október og viljum við þakka ykkur fyrir að sækja svo mörg skólann heim. Það er okkur ómetanlegt að þið sýnið skólastarfinu áhuga. Gott upplýsingaflæði og samstarf milli heimila og skóla stuðlar að vellíðan og velgengni nemenda.

Við hvetjum líka foreldra til að láta okkur vita um það sem betur má fara, svo við getum bætt skólastarfið og stuðlað að betri líðan nemenda. Einnig hvetjum við ykkur til að fylgjast með og taka þátt í starfi FORMA, foreldrafélagi MA, en fundargerðir og önnur gögn um félagið eru á vef skólans.

Spurt og svarað

Eðlilegt er að ýmsar spurningar vakni um skólann og fyrirkomulag hans svo og þá þjónustu sem nemendum stendur til boða. Hér eru örfá dæmi:

Hvernig á að tilkynna veikindi?

Veikindi þarf að skrá í Innu að morgni dags. Ef það er ekki mögulegt, er hægt að senda póst á ma@ma.is eða hringja í síma 455-1555.

Ef nemandi kemst ekki í próf / verkefni á önn vegna veikinda?

Tilkynna þarf veikindin á hefðbundinn hátt er gott að senda viðkomandi kennara póst auk þess sem nemandinn þarf að ræða við kennarann strax og hann kemur aftur í skólann eftir veikindi. Ekki eru sjúkrapróf vegna allra símatprófa. Nánar í kennslu-áætlunum áfanganna.



2. bekkur á Hólum í Hjaltadal

Hvað sé ég á INNU?

Á inna.is má fylgjast með mætingum nemenda, sjá miðannarmat sem birt er fyrstu helgina í nóvember og aftur um miðja vorönn, sjá lokaeinkunnir í áföngum að loknum próftíðum í janúar og maí/júní.



1. bekkur við Námaskarð

Hver er lágmarksmæting?

Skyldumæting er í skólann og afar mikilvægt að ólöggráða nemendur mæti vel, það stuðlar að betri vinnuanda í bekk og góðri ástundun og ýtir undir skuldbindingu í námi. Lágmarksmæting er 90%.

Veikindi í lokaprófum?

Skólinn krefst læknisvottorða vegna veikinda í lokaprófum. Jafnframt þarf að tilkynna veikindin að morgni prófdags. Ef það er gert og vottorði skilað er nemandi sjálfkrafa skráður í sjúkrapróf (athuga að hér er eingöngu verið að tala um lokaprófin í janúar og maí).

Hverjir veita leyfi?

Hægt er að biðja um leyfi hjá skólameistara eða aðstoðarskólameistara. Fjarvistir vegna leyfa lækka mætingaprósentuna en ef nemandi mætir að öðru leyti vel og sinnir náminu af kappi er tillit tekið til þessa. Nemandi ber þó alltaf ábyrgð á því sjálfur að ræða við kennara ef til dæmis próf, hópvinna eða önnur verkefnaskil lenda á leyfisögum.



1. bekkur í Síldarminjasafninu



Hvaða upplýsingar eru á Moodle?

Aðeins nemendur fá aðgangsorð að moodle þannig að ef að foreldrar/forráðamenn vilja fylgjast með þar þurfa þeir að fá lykilorðið hjá barni sínu. Mismunandi er hversu mikið kerfið er notað í áföngum en til dæmis gegnir það veigamiklu hlutverki í menningarlausni og náttúrulæsi í 1. bekk og eru allar verkefna-lýsingar þar inni.

Hvenær eru lokaprófin?

Prófdagarnir eru frá 12. janúar til 23. janúar. Nemendur í 1. bekk ljúka sínum prófum eitthvað fyrr. Athugið þó að sjúkrapróf eru síðan 26. janúar og endurtökupróf í nokkrum greinum 29. janúar.

Hvar er hægt að nálgast upplýsingar um skólann?

Helsta upplýsingaveitan er heimasíða skólans, ma.is. Þar má finna allar reglur, námsferla og skipulag og áfangalýsingar. Einnig má benda á bækling sem öllum foreldrum nýnema var sendur í tölvupósti í haust. Að auki má að sjálfsögðu alltaf hafa beint samband við skólann, svo sem á netfangið ma@ma.is eða beint á stjórnendur, námsráðgjafa eða umsjónarkennara.

Hvenær er jólafríið?

Jólafrí hefst að lokinni kennslu föstudaginn 19. desember og kennsla hefst að nýju mánudaginn 5. janúar.



Árshátíð MA 2014

Stærsti viðburður félagslífsins er árshátíð skólafélagsins, haldin 28. nóvember í Íþróttahöllinni. Undirbúningur er allur í höndum nemenda og kappkosta þeir við að gera hátíðina eftirminnilega hverju sinni, meðal annars með því að skreyta höllina eftir ákveðnu þema. Enn hefur ekki verið ljóstrað upp hvert þemað í ár verður. Ein af hefðunum í tengslum við árshátíðina er að dansa gömlu dansana og eru æfingatímar í íþróttum vikuna á undan. Yfirleitt er mikil stemning á efri hæðinni í höllinni og fjölmenni að dansa gömlu dansana.

Frá námsráðgjöfum

Prófkviðanámskeið verður haldið seinnihluta annarinnar og verður auglýst síðar. Nemendur eru hvattir til að hafa samband við námsráðgjafa sem fyrst ef þeir telja að prófkviði hamli árangri. Annan hvern mánudag eru auglýst örnámskeið í námstækni þar sem farið er í góðar vinnuvenjur í námi eins og tímastjórnun og skipulag, lestrar- minnis og glósugerð. Nemendur geta farið í áhugasviðskannanir til dæmis ef vafi leikur á vali á námssviði.

Hægt er að kynna sér þjónustu námsráðgjafa og reglur um lengri próftíma á vef skólans - eða með því að hafa samband við námsráðgjafa.



Námið

Nýju skólastigi fylgja nýjar áskoranir og vissulega getur námið verið krefjandi. Á fyrsta ári takast nemendur á við nýjar greinar, eins og menningarläsi, náttúrulæsi, frönsku eða þýsku auk þess sem námsgreinar sem þeir þekkja úr grunnskóla, eins og enska og stærðfræði eru á þyngra stigi en áður. Í öðrum bekk er aðgreining sviðanna orðin meiri og þar koma einnig inn nýjar námsgreinar eins og sálfræði og efnafræði.

Um stærðfræðina

Stærðfræðikennsla í MA hefur fyrst og fremst tvö megin markmið, annars vegar að undirbúa nemendur fyrir frekara nám og hins vegar að veita þeim almenna menntun. Þar sem nemendur á tungumála- og félagsgreinasviði (TFS) stefna yfirleitt á nám sem reynir minna á stærðfræðikunnáttu, er áherslan meiri á almennu menntunina á því sviði en á raungreinsviði (RGS). Nemendur RGS hafa hins vegar valið sér leið sem felur í sér nám í raungreinum og stærðfræði á meðan þeir eru í MA og býr þá undir frekara nám í raungreinum, heilbrigðisgreinum eða öðru.

Áherslumunurinn milli sviða í 1. bekk liggur fyrst og fremst í því að á RGS er ekki aðeins lögð áhersla á dæmareikning, heldur líka að nemendur kynnist fræðilega hluta stærðfræðinnar, svo sem sönnunum reglna og skilgreiningum hugtaka. Þess vegna er fyrsti áfangi á RGS á 2. þrepi, sem þýðir að nemendur eiga að kunna þokkalega vel efni grunnskólans svo að hægt sé að byggja ofan á það. Á TFS er fyrsti áfangi á 1. þrepi, sem þýðir að efni hans skarast verulega við efni grunnskólans.



Heilsueflandi framhaldsskóli

MA er þátttakandi í verkefninu Heilsueflandi framhaldsskóli, fjórða árið í röð. Lögð er áhersla á mismunandi viðfangsefni hvert ár, geðrækt, hreyfingu og næringu og þetta árið er sjónunum beint að heilbrigðum lífsstíl. Formleg opunarhátíð var haldin miðvikudaginn 12. nóvember.

Námskrá og skólatími

Menntaskólinn á Akureyri var einn fárra skóla sem vann að endurskoðun og endurskipulagningu náms skv. nýrri námskrá menntamálaráðuneytisins og hefur starfað samkvæmt henni í fjögur ár og hið fimmta er komið áleiðis. Fyrstu stúdentar samkvæmt nýrri námskrá voru brautskráðir síðastliðið vor. Nú í vetur, að lokinni heilli umferð í nýju kerfi, ef svo má að orði komast, verður unnið að endurskoðun námskrárinnar og skoðað hvað tókst vel og hvað má betur fara.

Samhliða endurskoðun námskrárinnar verður leitað leiða til að stytta námstíma til stúdentsprófs fyrir þá sem þess óska, en ráðuneytið hefur haft slíkt á þrjónunum mörg undanfarin ár. Skólameistari hefur lengi verið talsmaður þess að í MA verði sveigjanleg námslok, þannig að nemendur geti átt val um að ljúka skólanum á 3 árum eða lengri tíma. Fyrsta skrefið til að stytta leiðina að stúdentsprófi var hraðlínan, sem verið hefur í skólanum um árabil, þar sem tekið er við námslega sterkum nemendum sem kjósa að sleppa 10. bekk grunnskóla. Þessi leið hefur gefist afar vel. Nú verður leitað leiða til að flýta námi án þess að draga úr gæðum þess.



Í útikennslu í Innbænum

Matur og næring

Menntaskólinn er í hópi heilsueflandi skóla. Það þýðir að vísu ekki að allir borði eingöngu vítamín og ómalað bygg, en leitast er við að auka hollustu þess sem í boði er. Stúdentar 1973 færðu á 40 ára stúdentsafmæli sínu skólanum að

gjöf vatnsbrunna sem eru á þremur stöðum í skólahúsunum. Þriðjubekkingar, sem reka sjoppu í frímínútum, hafa í vetur leitast við að hafa á boðstólum hollustufæði og dregið úr sælgætisúrvalinu. Mikill fjöldi nemenda borðar reglulega í Mötuneyti MA og með hverju árinu fer fjölgandi þeim bæjarnemendum sem kaupa sér fast fæði í hádeginu alla skóladagana.



Heimsókn í Mosfellsbæ

Kennarar kynna sér nýjungar

Kennarar í menningar- og náttúrulæsi fóru á dögum í kynnisferð í tvo nýlega framhaldsskóla, Menntaskólann í Borgarnesi og í Framhaldsskólann í Mosfellsbæ. Skólarnir í Borgarnesi og Mosfellsbæ eru forvitnilegir fyrir margra hluta sakir, til dæmis vegna hönnunar og einnig þess að þar er mikið lagt upp úr símati en minna úr hefðbundnum prófum, líkt og er í náttúru- og menningarlæsi. Þá er Mosfellsbæjarskólinn svæðisskiptur þannig að námsgreinar eiga sína klasa og námsumhverfi er þar afar sveigjanlegt og fjölbreytt.

Listaverk mánaðarins

Menntaskólinn á Akureyri á mikið safn listaverka sem honum hefur áskotnast á löngum starfstíma. Verkin eru um öll skólahús, til dæmis í flestum kennslustofum, svo nemendur og starfsmenn eru umvafðir íslenskri myndlist alla daga. Nýverið var bryddað upp á þeirri nýjung að birta á vef skólans listaverk mánaðarins, en flýtyllur á þá síðu er á aðalsíðu ma.is.



Fleira úr félagslífinu

Félgsmiðstöð nemenda er Kvosin, þar hittast þeir í frímínútum og þar fer fram félagsstarfið að loknum skóla. Tvisvar hefur verið söngsalur og sungið af kröftum í eina kennslustund. Jökull Bergmann kom og spjallaði við nemendur á Evrópska tungumáladeginum og Ævar Þór Benediktsson rithöfundur og leikari í tilefni Dags íslenskrar tungu. Nemendur hafa einnig farið af bæ, menningarferð var farin til Reykjavíkur og námstengdar ferðir, eins og annars staðar kemur fram.

Skólafélagið Huginn er kjarni félagsstarfsins og stjórn þess hefur yfirumsjón með störfum annarra félaga. Og nú er undirbúningur árshátíðar að fara af stað.

Bekkjabikarinn

Bekkjabikarinn er nýstofnað undirfélag skólafélagsins Hugins. Tilgangur félagsins er að efla bekkjarheildina í MA í nánu samstarfi við stjórn Hugins og helstu undirfélög þess.

Í stuttu máli er Bekkjabikarinn keppni um titilinn "Besti bekkur MA". Fyrir liggur listi með 100 atriðum sem gefa 1-5 stig sem bekkir geta gert (80% atriði sem kosta nemendur ekkert) og fá þannig stig fyrir. Sá bekkur sem hefur við lok vorannar safnað flestum stigum hlýtur titilinn "Besti bekkur skólans" ásamt farandsbikar og verðlaunum. Atriði á listanum eru sambland af ferðum, íþróttum, áskorunum og verkefnum sem bekkir geta leyst saman og miðast við að 2/3 bekkjarins þurfi að taka þátt svo að stigin fáiast. Þá geta bekkir skorað á aðra bekki eða kennara í hinu og þessu.

Markmiðið með Bekkjabikarnum er að fá bekki til að gera eitthvað annað en að djamma saman, gera fjölbreyttari hluti sem eru bæði skemmtilegir og heilsueflandi og virka hvetjandi á félagslífið. Þá eru viðburðir á listanum margir haldnir af öðrum undirfélögum sem virkjast þá enn frekar. Það er okkar markmið að þetta hafi jákvæð áhrif á skólaandann, bekkjarheild og forvarnarstarf skólans án þess þó að virka þvingandi. (Bekkjabikarinn, Sólveig Rán Stefánsdóttir 4T)

Félögin

Fjölmörg félög eru starfandi innan skólans, bæði fjölmenn og fámenn og er um að gera að hvetja börn ykkar til að taka þátt í félagslífinu. Allir viðburðir sem haldnir eru í skólanum og eru á vegum skólafélagsins eru áfengis- og vímuefnalausir og hafa nemendur lagt metnað sinn í að halda því þannig.

Þátttaka í félagslífi skólans getur leitt til betri líðanar nemenda í skólanum og haft jákvæð áhrif á félagslegan þroska.



Kept í námsgreinum

Á hverju ári eru haldnar keppnir fyrir nemendur í framhaldsskólum í ýmsum námsgreinum, eðlis- og efnafræði, stærðfræði, ensku, frönsku og þýsku svo dæmi séu tekin. Þegar hefur verið haldin forkeppni í stærðfræði og komust þrír MA-ingar áfram í aðalkeppnina, Atli Fannar Franklín 2. U, Brynjar Ingimarsson 2. T og Jóhann Ólafur Sveinbjarnarson í 3T. Eitt lið frá MA tók þátt í Boxinu, en það er keppni sem er ætlað að stuðla að auknum áhuga á verk- og tækninámi og starfi í iðngreinum. Keppendur þurfa að leysa krefjandi þrautir sem reyna á rökhusun og verkvit. Liðið skipuðu fimm nemendur á eðlis- og stærðfræðikjörsviði í fjórða bekk.